



Qaanaami kulturimik toqqammaveqartumik immikkuullarissumllu piniariaatsit kinguaariinnut aggersunut iluaqutissatut qanoq ililluta tammatsaalineqarnissaannik qulakkeerinnissinaanerput pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Mikivusuk Thomassen, Inuit Ataqtigiit)

Kulturitsinni ileqqutoqqagut illersussavagut tamannali pissaaq siuariartorneq ineriartornerlu ajoqusernaveersaarlugit. Taamaattumik oqallinnissamik Inatsisartunut ilaasortap Mikivusuk Thomassenip saqqummiussaa kusanarpoq. Qujavunga.

Demokraatini aallarniutigalugu paasivarput inatsimmi pioreersumi ilaatigut Qaanaami piniariaatsit immikkuullarissut illersorneqarnissaat periarfissaareersoq. Tamanna Demokraatini nuannaarutigaarput.

Isumaqarpugut najukkami piniariaatsit qanoq ittut akuerineqarnissaat aalajangerneqarsinnaasariaqartoq aamma suut akuerineqassannginnersut tassunga ilanngullugu kulturikkut piniariaatsit illersorneqarnissaat.

Isumaqarpugut malittarisassat atuuttut najukkami kikkut tamat oqaasissaqaqataanissaannut periarfissiisut pitsaanerpaamik. Demokraatini tamanna aaqqiissutissani pitsaanerpaatut isigaarput.

Taakkuugaallarput Demokraatini oqaatigiumasagut.